

袁中郎詩集

上冊

襟霞閣普及本



上海中華書局
發行

袁中郎詩集上冊

擬古樂府

附雜體

樂府之不相襲也。自魏晉已然。今之作者。無異拾唾。使李杜元白見之。不知何等呵笑也。舟中無事。漫擬數篇。詞雖不工。庶不失作者之意。具眼者辨之。

飲馬長城窟行

長城水鳴咽。夜夜作秦語。問子何代人。防胡舊軍旅。冤魄滯孤魂。不得歸鄉土。白水洗白骨。癥盡水酸楚。洗多成黑流。水性毒於蠱。立馬古戰場。長嘶待天雨。

長安有狹斜行

按金駒。立長溝。枇杷落盡茱萸秋。山西女兒帕勒頭。面上堆粉鬢堆油。二十五絃彈箜篌。猩紅衫子葡萄綉。笑問南裝如此不。

結客少年場行

結交徧四海。鄉人無半識。恥納無意儒。寧結有心賊。白手一布衣。喜怒關通塞。將相每在門。望氣

如望職。易卜天昏晴。難候君顏色。頭顱可擲人。一顧不可得。

釣竿行

巖灘一絲名。渭水一竿勢。所釣非所求。巨鱗安得至。不如無名子。心胸少根蒂。朝隨鷗保歌。夜引魚蠻醉。探水如探甕。隨手得鰕鱖。鮮蔬養活魚。無鹽亦有味。

秋胡行

堂上姑待汝。袖中雖有金。不堪贈彼姝。妾懷如日。君情若泥。路旁之心不自保。安保他國無蛾眉。沙浩浩。水咽咽。妾死情不死。節。河水如可竭。妾腸當再熱。

妾薄命

落花去故條。尚有根可依。婦人失夫心。含情欲告誰。燈光不到明。寵極心還變。只此雙蛾眉。供得幾迴盼。看多自成故。未必真衰老。辟彼數開花。不若初生草。纖髮爲君衣。君看不如紙。割腹爲君餐。君嚙不如水。舊人百宛順。不若新人罵。死若可回君。待君以長夜。

有所思

人生如驛騎。往復無停勒。胸懷無盡絲。漫天作虛織。秋霜與春風。乘間遞爲賊。衰老迫紅顏。白髮

傳消息。積雪填枯井。井深填不得。眉棱萬斤重。白日沉幽墨。欲行戒險難。欲飛防繪弋。

善哉行

今日相樂。式舞且歌。鷗絃鐵板。白面青娥。食羔以匕。盛酒以盆。刀鐮亦厭。何必河豚。儒迂墨儉。跖非堯是。善哉諸君。請入禪裏。讀書不成。學仙寡效。驢腹鷓枝。從吾所好。

猛虎行

甲蟲蠹太平。搜利及邱空。板卒附中官。鑽簇如蜂踊。撫按不敢問。州縣被訶斥。槌掠及平人。千里旱沙赤。兵衛與郵傳。供億不知幾。即使沙沙金。官支已倍蓰。鑽徒多劇盜。嗜利深無底。一不酬所欲。忿決如狼豕。三河及兩浙。在在竭膏髓。焉知疥癬憂。不延爲瘡疽。

相逢行

行行卽曲巷。曲巷多蒿草。牕路掠蛛絲。讀書歲月老。壁上榮啓圖。手裏黃石編。當盡三時衣。不直數緡錢。兒女無揮著。常時煨故紙。稅地植桃花。十樹九樹死。君莫悲腐草。腐草發光耀。元霜長冬青。白髮傲年少。

悲哉行

石馬立荆棘。荒城叫老狸。昔時冠帶人。唯有鶴來歸。宿志慕長生。朋黨盡刺譏。父母不我容。碧海三山飛。朝牧老君龍。莫守劉安雞。仙家歲月長。桃子三垂枝。歸來見荒塚。半是孫曾碑。城池百易主。族里無從知。古人悲夜繭。今我亦似之。白骨不可語。鶴歸空爾爲。

門有車馬客行

門有車馬客。錦襴烏紗巾。寒毛接短鬢。絲絲沙與塵。問子何勞勞。上書西入秦。八年始一命。官卑不救貧。冒霜掛槐柳。望灰拜車輪。一身百糾縛。形如一束薪。手纏不自解。利刃寄他人。蕉與藥同餐。雖甘亦苦辛。

短歌行

酌君易州之清醞。被君吳閫之織綺。男兒二十無所成。腰肢一半沒青草。趁輕健。買驪鬘。哭聲多。笑聲少。黃金蕩盡君莫嘆。古來餓殺幾賢人。

京洛篇

煌煌京洛城。朱衣喧廣道。白首賤書生。驢馱掛詩草。懷刺謁恩門。門卒相輕眇。十上十不達。登街顏色槁。疊身事貴公。習諛苦不早。罩眼一寸紗。茫茫遮人老。

鰕組行

鰕組出潢潦。道逢東海使。魚服而介身。呬浪以相戲。物微恐見侵。跳波爭努臂。東陂招能兄。西谿喚螺弟。水蟲萬餘種。各各條兵議。聚族鼓鱗鬣。不能當一噓。

升天行

乘赤霧。鞭鸞輶。路逢王子晉。玉簫已吹折。織女弄機絲。餘緯爛霄闕。下土蟻虱民。誤喚作雌霓。張翁老且耄。舉止多嫖褻。侍仙三萬年。不曾見隆準。真人多竄左。天狐慘餘孽。義御失長鞭。牽牛嘆河竭。

權歌行

妾家白蘋洲。隨風作鄉土。弄篙如弄鍼。不曾拈一縷。四月魚苗風。隨君到巴東。十月洗河水。送君發揚子。揚子波勢惡。無風浪亦作。江深得魚難。鸕鶿充餒臚。生子若鳬雛。穿江復入湖。長時剪荷葉。與兒作衣襦。(魚苗風。洗河水。皆長年語。)

青驄馬

青驄馬。九尺強。百金買。千金裝。雙蹄不著地。影滅如飛翔。借問冶遊郎。何爲在他鄉。下馬立青梧。手提碧珊瑚。千喚不知人。盡眼眇當壚。當壚豈不治。褰衣愁曉露。五步一停驄。十步一回顧。客從遠道

來。贈我青鸞帶。交頸復同心。白石青松在。東家好女秦羅敷。西家蕩兒馮子都。鴛鴦只愛毛翎好。那知水底有鵜鶘。

折楊柳

艷陽二三月。楊柳枝參差。每逢雙燕子。憶得別君時。憶得別君時。遣君珊瑚枕。君行佳麗地。何人薦君寢。越女性如綿。吳妓情似紙。夫君浪子心。吹作東西水。前月父書來。道君遊淮北。今月見君字。知作江南客。江水自清流。照君不照妾。

紫騮馬

紫騮馬。行且嘶。願爲分背交頸之逸足。不願爲追風絕景之霜蹄。霜蹄滅沒邊城道。朔風一夜霜花老。縱使踏破天山雲。誰似華陰一寸草。紫騮馬。聽我歌。壯心耗不盡。奈爾四蹄何。

短歌燕中逢樂之律作

下馬一言。不及暄寒。昔年毛羽。今日肺肝。我懷如痞。君懷幾許。登堂直視。無心可舉。明月浮空。清霜墮地。將軍北園。金吾西第。羅屏畫掩。金壘夜開。呼盧射覆。飛爵流杯。吾爲若舞。若爲吾歌。劍去龍沉。逝將奈何。情長刻短。爐寒火青。欽尊亂筇。誰是主人。鵬飛九萬。爲鸞鳩笑。我欲攜君。連翩海嶠。

橫塘渡

橫塘渡。臨水步。郎西來。妾東去。妾非倡家人。紅樓大姓婦。吹花誤睡郎。感郎千金顧。妾家住虹橋。朱門十字路。認取辛夷花。莫過楊梅樹。

醉鄉調笑引

無懷十六傳。乃至酒聖人。其道尙清淨。無爲而化成。周公作酒誥。流言幾禍身。宣王不得已。乃爲述酒經。經曰。天有酒。則不傾。國有酒。則不爭。有王者起。必世而後仁。何用導以德。齊以刑。但當引酒爲河。累麴爲城。日月所照。霜露所墜。凡有血氣者。莫不醉醒醒。死兮不知死。生兮不知生。沃殺知巧鬼。何愁不太平。

劍泉上

劍泉上。山如黛。劍泉下。水如佩。一片青。閩人代。鬼竊窈。山巖巖。生公法。今何在。眞娘墓。遙相對。一日計千舟。一舟計萬錢。寧負公家稅。莫負少年年。女可鬻。妻可徙。石上歌。應不止。

逋賦謠

索逋賦。逋賦索不得。不是縣家苦催徵。朝廷新例除本色。東封西款邊功多。江淮陸地生洪波。內

庫馬價支垂盡。民固無力官奈何。蘇州舊逋七十萬。漕折金花居其半。安得普天盡雨金。上爲明君舒宵旰。嗟乎。民日難。官日苦。竹開花。鑛生土。

祝雨

雲縷縷。山絮絮。寒欲來。暖先據。洗山山骨新。洗花花色故。寄言行雨兒。莫下山頭去。

西陵橋

西陵橋。水長在。松葉細如鍼。不肯結羅帶。鶯如衫。燕如釵。油壁車。斫爲柴。青驄馬。自西來。昨日樹頭花。今朝陌上土。恨血與啼魂。一半逐風雨。

宋帝六陵

冬青樹。在何許。人不知。鬼當語。杜鵑花。那忍折。魂雖去。終啼血。神靈死。天地羶。傷心事。犬兒年。錢塘江。不可渡。汴京水。終南去。縱使埋到厓山厓。白骨也知無避處。

西施山 一名土城西施教歌舞處

西施山。一片土。不惜金作城。貯此如花女。越王跪進衣。夫人親蹋鼓。買死傾城心。敎出迷天舞。一舞金閭崩。再舞蘇臺折。槌山作館娃。舞袖猶嫌窄。舞到夫差愁破時。越兵潛渡越來溪。

入青口

入青口。青口山何直。雲老玻璃天。鬼下空青壁。一絡罌風吹地起。神禹無功巨靈死。

二

入青口。青口山何仄。石人立而啼。雲吼吼相逼。紺巖開老沉香花。飛仙失路虎無家。

三

入青口。青口山何翠。澗色吠琉璃。山花紅玳瑁。天荒地窘無行處。山頭魍魎紛來去。

玉京洞

深如谷。高如屋。穴雲心。穿地腹。路荒唐。齒嶮巖。石如病。天似癡。黃者漿。白者髓。雲絮絮。出韞底。白蝙蝠。大於雞。衝焰起。撲人飛。突而高嶺間之。忽而平豁限之。龍欲言。聞人止。涎沫流。腥風起。鬼邪仙。烟歟霧。炬無光。將安去。海可通。江可涉。靈威丈人難再得。

別石簀 十首不容分析故總入雜體

別石簀。石簀何忍別。相知是相知。知處難容舌。一等是肝腸。輸君生死切。烈火燎虛空。火盡空不

滅。

其二

古今只四倫。大抵缺朋友。誰識楚越人。萬里爲奇偶。我腸寄君心。君心出我口。覓同本自無。異於何處有。

其三

一葉隨東風。飄泊已半載。梯雪度深山。寒氣鑱孤拐。三入淨寺門。寺僧笑狂駭。欲得不相譏。除非觀自在。是仙是凡人。請君是揮解。

其四

君攜我如頭。我從君若尾。不是西看山。便是東涉水。誰家薄福緣。生此兩狂子。受用能幾何。苦他雙脚底。

其五

學道不學禪。談星不談義。愛曲不愛音。讀書不讀字。人天收不得。賢智亦爲祟。不知何因緣。偏得同臭味。每笑儒生禪。顛倒若狂醉。除却袁中郎。天下盡兒戲。

其六

南山有禽其字曰希有。北山有鳥其名曰鳳凰。兩鳥排雲扶霧入虛空。虛空莽莽四顧絕稻梁。下界豈無七寸之梗米。爭奈網羅纈纈常高張。

其七

不卽凡。不求聖。相依何。覓性命。三入湖。兩易令。無少長。知名姓。湖上花。作明證。別時衰。到時盛。後來期。不敢問。我好色。公多病。

其八

歸去尋阿賓。阿賓亦可人。公家廿一弟。超脫是其倫。天不孤生物。有軻必有輪。狂態誠可取。其若頭上巾。

其九

氣噓爲風。雲流爲水。人之小人。天之君子。鴨不能飛。蚓不能躍。鼻哭非愁。鸞歌非樂。無曰升天。天卑於淵。無曰瞰淵。淵高於天。卽佛卽聖。非儒非禪。

其十

能再相從否。若駕相思車。當問白門柳。

酒正喧蕭君席上作

酒正喧。關吏言。請君秣馬飭歸轅。巴川健兒豕成羣。邀官挾吏通州門。逐虎怯。逐飛蚊。倭刀吼室。箭出韃。東坊西市榜明文。不嚴軍律嚴司關。木門蒼琅根。日未昏。斷行人。

坐王官谷朋石館得石字

林家梅。米家石。荀家香。謝家屐。鶴瘦帶道容。松老入詩格。竹子一萬梢。十里屯秋碧。雞花四五種。聊作琅玕役。貯雪點梅湯。和香燒笋炙。一分供調御。一分待幽客。

洋溪湖嘲沈青平

家湖頭。客湖尾。深盎淺甕量魚子。大婦得白鯪。小婦得赤鯉。天乾富馬滂富鮓。驅兒牧豕荻根下。

二

湖頭船。湖尾屋。丈人把叉壻收目。朝舖乾鼈裙。暮膾鮮鯽絲。螺頭蚌子送婦歸。

戲題道士泐小孤詩真山翻作假山看

道士名。髡其顛。真石壁。貌假山。陽戶開北面。東流水西還。采石蛾眉小姑娘。蒼瘦爭似老黃冠。江漢手覆三迴乾。古風遺尾青闌干。

代青溪道士見招

青溪月。和霜和水發。萬仞沁寒潭。冷盡玻璃骨。青溪花。傍水帶烟斜。東曲謝蘭香。西曲萼綠華。青溪水。雲根洗清泚。朝浸用里芝。暮烹王烈髓。青溪雪。萬頂千峯徹。隔浦喚仙奴。夜春雲母宵。君之來。猿鳥笑。雲爲舟。風爲棹。鬼谷罷談。孝先徒竈。驂鳳與駕鵠。知非君所好。吾爲君招赤城之化骨。及絕逸之髯。君爲我歡然而就道。君不來。雲山悞。

嘲王以明先生

王夫子。有書如郝隆。何緣阿堵堆青銅。君不見牀頭有心癩夷甫。道上無人追楚弓。

雀勞利歌

雀勞利。雨雪至。大雀悲。小雀悸。黃鵠舉千里。大鵬搏九萬。鷗鵠與杜宇。聲聲來相勸。宇曰不如歸。鵠曰行不得。小大各有分。何用嘈嘈在我側。鸚鵡雖有舌。藏巧不如嘿。

採蓮歌

採蓮花。花開何鮮新。映月爲處子。隨風作舞人。深紅淺白間秋水。妬殺麻姑與洛神。採蓮葉。蓮葉連香櫂。一片青花古玉盤。持贈秦娥與燕妾。採蓮子。蓮房劈破香且美。纖手分來顆顆勻。何事經年沉

湖水。湖水深猶可。水濁情無那。試問南溪二月泥。妾心辛苦知不知。

戲別唐客客豐城人

年年爲客向瀟湘。楚澤烟雲拾滿囊。綿花如雪歸故鄉。歸故鄉。應知青雀臨流日。內人蟾子墜衣裳。

其二

年年爲客向章臺。面脂如珠紅滿鬚。襖褐行纏歸去來。歸去來。種得油麻如黍子。依舊風帆向楚開。

浩歌

雲作雨。不成歸。箭離弦。無還期。昨日犬。前日獅。一番花。一番泥。花有色。檻周之。人有容。鏡照之。鏡方新。容已非。檻未敝。花先飛。短可續。用何物。一曲歌。三杯醪。我欲長生天下人。拔刀斬斷金烏足。

諸衲送至江干自嘲

油江渡。二十年中五番去。餐雲醉石幾經春。畢竟驅上長安路。油江上。柳如雲。江若有知應移文。隔谿老衲笑且語。塞耳喧呼如不聞。

戲作三星行送曹子野歸楚時予亦將歸里

石公先生。汝生以鄭爲宅。以水爲度。眠龍痴蛟。鞭其尾而不飛。唯有蟄龍聞雷而起。仰天滂滂。如有訴。所樂者瘦壤清泉。所吟者溪風月露。有竅無心。何所鬱以鳴。不過感時觸機。如風行於空。而萬竅自怒。隱流縑客。目爲山中之韶譏。識者又以爲偏枯冷淡。似於陵仲子之清軒轅彌明之句。石公撫几而笑曰。曹君。汝豈敦煌之索平原之輅。長安冠帶隘巷陌而相求。胡爲乎逐西風而遠去。君旣脂車。余亦戒路。望江上之青峯。指湘臯之紅樹。漢沔相踞。一衣帶水。埃君於油口之渡。左公城外綠刺天。便是巨擘高吟處。（巨擘。蚓之大者。）

過中山見諸名蹟題清風店壁

中山酒可飲。塔可登。輞川翠竹風稜稜。東坡瘦墨如健鷹。唐封古蹟石峻嶒。刺史愛民慈且能。高看青山夜抱冰。

石公解嘲詩 有序

客有嘲石公不能飲者。石公作詩解之。石公不知何許人。嘗吏吳。登石公山而樂之。因自命曰石公山人。

醉國之君臣。未必皆飲徒。石公西來時。曾一造其廬。飲流相與言。不飲真害馬。寧知醉國遙。不在杯與罍。辟如解琴人。非是用絃者。又知古董家。不必善陶冶。海闊酒池波。天限糟邱域。大有麴蘖郎。欲往不可得。於是石公乃攘袂而起。撫手按節而爲之歌。歌曰。昔者汝陽王。道逢麴車口流涎。醉鄉之日月不加延。後來蘇子瞻。望酒盞而醉。醉鄉之日月不加逝。又歌曰。信美此土兮。樂而忘死。彼國之人兮。愛賢好士。彼國之王所與遊者何人兮。華胥之君臣西方之父子。彼國無劫數等量兮。不知者以爲自西而開至卯而止。於是醉君聞石公名。乃召以爲客卿。

潼關題壁

官道上。塵昏昏。郵舍中。氣熅熅。夾道如火益膏薪。枯魚失水噉其脣。華山君。豈不聞。濡筆雨。和墨雲。十丈蓮焦玉女嘔。乘風自振瀟湘裙。夜半澆我洗頭盆。

贈李醫者

秋橘綠成行。方書白滿架。君非韓伯休。胡乃不二價。去年襦褐辭鄉里。遊來半載聲名起。參苓如山信手空。門前冠帶若流水。長安醫士亂於麻。箇箇烏紗似老鴉。誰似豐城李公子。談笑直揖五侯家。朝賣藥。晚致身。大婦喜。小婦嘖。席未溫。呼先生。